

四庫全書

集部

欽定四庫全書

淳熙稿卷十九

宋 趙蕃 撰

七言絕句

元日寄成父四首

舊時元日羨吾廬稱壽獻觴惟有餘  
今日兕曹還效我  
凄然事憶十年初

家家節物競今朝風俗未分南北遥  
莫向除薪覓如願

且憑爆竹走山魃

冒晨造謁愧悠悠殘客不來門更幽邂逅行人覓花看  
春風已屬杏梢頭

客裏那知歲月遷梅花報我又今年蘭溪橋下扁舟泊  
把筆題詩意惘然

二月初八日

只道貧無置錫地根株戢戢自何生春風向暖渾宜袂  
拋擲殘綿傍砌楸

三月一日

粵山深厯備辭勞雖有故人誰贈袍  
歸卧茅齋且休歇  
竹風山雨兩蕭騷

三月六日

桐花最晚開已落春色全歸草  
滿園破衲欲捐還未可  
炎涼翻覆在朝昏

自把殘書洗睡昏欲求甚解與誰論  
乍然好鳥聞深樾  
忽爾荒雞聽遠村

怪底朝來暖欲昏  
故應晚雨劇翻盆  
空齋寂寞催成睡  
風為捲書還閉門

初九日

一片花飛春未知  
杜陵野客已深悲  
況堪昨夜狂風雨  
吹折東家挑樹枝

日日題詩待海棠  
要從地主借繩床  
偶因風雨愆期至  
已是飄零學退粧

十一日

老眼看花抵霧中  
寥寥鼻觀與香通  
水僊蛻去梅成實  
只有山礬印此風

老去讀書非少年  
故憐鰕鮓尚加鞭  
看竹偶然閒半日  
歸來還愧腹便便

獨行

獨行曼曼遶江湄  
正是春風日暮時  
折得芳馨無所遺  
寄懷空誦碧雲詩

春風浩浩水橫波  
水遠灘長可柰何  
送盡碧雲人不見

折蘭采若自行歌

登山臨水送將歸  
攬涕無從日向微  
水遠山高動千里  
春風浩浩客吹衣

春日雜言十一首

蘭也結根幽且深  
若為容易出山林  
定知亦以香為累  
不爾人於何處尋

山寒花事自遲遲  
歸至況當梅謝時  
祇有山櫻能照眼  
屬遭風雨又離披

寒多草亦未抽芽漫說春今一半加試向小園閒點檢  
忽逢一樹木瓜花

晚欣斜日照茅檐意謂新晴已可占雨脚曉收雲更合  
陽烏將出尚窺覷

買得荒園近塢居但供樵牧廢犁鋤漫營籬落今將合  
猶恨人工乏剩餘

舊時曾詠木蘭幽舊藁飄零莫自收老境不妨花固發  
人今白盡十分頭



落葉踈踈似雨鳴莫疑春晚有秋聲  
抽條易葉年年事  
看取一番新綠成

山中寂寞少花枝  
過盡春風病不知  
未分春歸便無跡  
陶甌聊復浸醪醪

春風吹綠綠成陰  
新有黃鸝度好音  
我政卷書成坐睡  
恍然疑是拂瑤琴

燕子日長宜讀書  
若為病思每欺余  
形骸筋力今如此  
慚愧丁年不荷鉏

渺渺春山啼杜鵑開花解使碧山然韓詩李賦紛難考

猶喜知名向謫僊

或謂此花即踰躅韓文公李衛公皆嘗及之未知即此物否

### 晚卧二首

軒小才堪置竹床晚來新浴快初涼掃除諸妄歸真想

蒼苔林中聞妙香

戲學韓公盆作池雨來亦解起風漪蛙鳴莫作鼓吹想

更問屬官仍屬私

### 夜賦

雨挾松聲落枕邊道人巾屨極蕭然忽思舊宿廬山寺  
曾聽懸崖瀑布泉

晚作

古屋黃昏蝙蝠飛爾飛干我竟何為但愁蚊子且生翼  
飽爾亦當侵我肌

夜作絕句三首

秋入吟牕夜氣清舊書雖老眼猶明悠悠行李空長缺  
落落功名負短檠

月明入戶白於霜  
林影當簷聳若翔  
睡味不應如許好  
不來吟咏答寒蟬

高下鐘聲一聽聞  
林梢落月亂紛紛  
忽來眼底詩無數  
頗念高人與細分

郊居晚行呈章令四首

斜陽渺渺下前陂  
牛自安眠兒得嬉  
行過中林却回顧  
眼邊依約有新詩

早禾打穀歸高廩  
橐結堆場尚若雲  
目見田廬無此比

勸耕知自令君勤

人言樂歲好催科吾令方知自拊摩要識田家略無事  
殺雞為黍自相過

淵明薪水憂兒子玉川送米煩鄰僧我今窮狀不可道  
減憂得米憂年登

還家二絕

小出端如遠客歸僕迎兒候犬循衣家人不問城中事  
但道雨多蔬茹肥

竹因易葉聽風吹入屋穿窻縱所之我亦閉齋愆掃溉  
渠因投隙遂紛披

八月八日發潭州後得絕句四十首

湘神知我愛湘中故遣舟遲匪厄窮可笑兒曹不解事

故云常值打頭風

是日逆風舟行寸寸而上

才把離觴已足悲沉哦別句慰相思月明未比夜來別

人影已知天外追

是日懷初七日閣下之集寄仲理德夫伯壽季成

平岸朝陽已映光高林宿靄尚深藏客中亟起繇何事

要趁侵晨數刺涼

鷗如玉潔鷺霜明閒意相看了不驚乃不悟予非慕者

決然飛背晚煙輕

罾塘斷港劣容舟鱖鱖盈籃叫不休我亦買之將作腊

要和蔬茹給飢喉

投罾政爾不能逃偶追還遭別網要此意豈能知數罟

不論他日且今朝

江中橫柵二罾舡對之  
每舉所獲輒呼聲譟然

南風縱急但溫其小雨雖微卻透肌永日蓬窓難坐卧

祇隨舷側就陰移

刻木如瓶粉漬之掛林聊當酒家旗我當物色登臨處  
亦復因之為解頤

借居雖陋自如常舟小安能具斛湯卻羨沈牛浮鼻去  
綠桑陰下趣蒼涼

扁舟往作櫓州過煙霧空濛祇市聲今夕再來還小泊  
却逢江月正空明

午風吹坼稻花香晨雨翻掀稻葉涼道上塵埃猶淨盡



田間歡樂詎能量

一年風月屬中秋今昔相傳無異流定自天公亦興此

故教雨脚破雲頭

是日雨而  
夜月皎然

廬溪望望接宣風景富猶能慰客窮已愛熙熙村舍好

更欣漠漠稻田豐

晚山能紫復能青遠嶺猶分近已冥好語忽然生眼底

遽將摹寫已無形

曉山能淺復能深淺似朝晴深似陰山色豈知朝暮改

行人自費短長吟

山驛雖荒亦可安，要眠衫月夜深寒。昨宵虛落才聞鼓，

明夕江皋想枕湍。

投宿愛  
直驛

露冷初疑是曉霜，風高已覺愛朝陽。莫云節變能如此，  
直念吾衰不復強。

城上青山遠近橫，城邊草樹亦相縈。城中臺殿還相倚，

畫手其誰為寫成。

袁州吉祥寺  
作凡二首

溪上秋來境倍佳，附城猶爾況村賒。卻嗟政爾營行棹，

不得於茲理釣車

仰山林壑舊曾遊擬欲重尋不自由倚賴艤舟相對處  
為予排闥向城頭

晚日才能度兩灘詰朝應復又成乾從來但說汭流苦  
到我順流良亦難

仰山山峙季溪流知我東歸俾暫留盡日如推復如盪

為之成喜不成憂

宜春余舊游故別之不無眷眷

兩岸多為激水輪創由人力用如神山田枯旱湖田滂

惟此豐凶歲歲均

烟消日出見秋真  
政恐卻成憔悴人  
賴是倦遊歸去日  
扁舟載著自由身

鷺鷥雖說擅風標  
永日灘頭腹苦枵  
鳬鷺雜居寧有異  
鷄羣鶴處更加驕

秀植如雲不可窮  
長杉鉅竹畧相同  
嗟余詎可如材者  
政似飄飄秋後楓

遙看巨石屹相衝  
不道中江有路通  
幾度跨羸行犖确

又成全室寄蓬籠

昌江直下水能平卻愛隴流激激聲頻歲水災何自拯  
政由疏鑿欠流行

病思昏昏略未醒木犀誰遣浸饒瓶兀然隨我故山夢  
竹故青青雨自零

三逕雖荒菊尚存重陽想見露花繁那知欲去去不及  
病卧他州空斷魂

去歲重陽事已訛今年亦復病蹉跎明年想見山中集

弟妹團藥黃菊歌

老去真成病不禁炎蒸三日瘡如侵江山舊識思新面  
佳處真成畧枕衾

季月將窮更起風秋聲亂雜擣聲中倦游歸去渾忘事  
淹速從渠不計窮

煮泉樹石悶幽深來景攔干敞眺臨可是溪山須一面  
懷人政爾動哀吟

暮色蒼然遂不開我舟亦欲傍崖隈不唯帆過誰家宿

水鳥林棲亦並來

落日蒼蒼烟樹林  
渚鷗沙鳥更浮沉  
過湖未遠猶空濶  
不見遙山出寸岑

日之夕矣下羊牛  
想見吾廬樹掩幽  
兒自閒行牛自去  
溪頭熟路不須求

大罇酒價舊知名  
樟樹姑洲得並行  
晨起亟思謀一醉  
遠鐘已作叫巖聲

午鵲紛紛無柰濃  
晚來微飲見山容  
鵝湖舊日經行地

清吹思乘十里松

終朝未厭哭灘聲  
歸近何妨細作程  
送盡鵝湖青一帶  
靈山已復遠相迎

與成父自信同舟到饒分路而別以詩送之三  
首

川行歷覽不知勞  
我有新詩聽汝抄  
今日語離還索句  
况堪風雨滿江郊

我自飄零更汝憂  
賤貧骨肉不相收  
馬家堤上休停騎



愁有居民說故侯

堤在無為無為先君舊治也

向來三復渭陽詩  
羨汝此行親見之  
若問廼兄何樣似  
家徒四壁更書癡

過湖得便風舟甚駛

鳥飛不盡水黏天  
隱隱青山若箇邊  
六幅蒲帆去如箭  
江神有意特相憐

連日得順風

上水深虞費挽牽  
順風似得江神憐  
雲山好處留不得

縱望令人空惘然

風

逆風忽作大王雄  
客岸淹留半日中  
亭午却回張席去  
向來駭浪亦潛空

大風二首

杯水得風猶渺然  
况茲章貢遠連天  
一窮坐我靡他問  
下水寧聞勞挽牽

頗愛峽江江上山  
幾回陶冶付毫端  
眼中誰為善圖貌

貌與桐江相並看

過生米市艤舟求浴望山巔有屋巋然至石岸  
數步宛轉荒級榜曰釣磯入門古壇對江上則  
有獨栢餘屋悉具體問之云施肩吾嘗垂綸於  
此栢則唐胡天師所植他無碑記惟華邦直則  
留題一詩有石刻因用其韻題釣磯又復用小  
閣壁間韻留題胡栢併書柱間浴罷理棹而去  
時淳熙戊戌七夕前一日也華詩句云一簇亭

臺瞰碧流坐無塵土染衣裘舟人來往風波裏  
指點神仙在上頭閣詩不佳故不錄

枕水危磯峙不流是誰曾此被羊裘遺蹤幾覓無從問  
落日清風過樹頭

荒壇有栢翠參天盡道栽從五代前仙事茫茫真是否  
試當風月聽茫然

過湖偶題書於鄒子之津

洞庭厥大九州間此地吞瀾未覺慳一抹遠青為四望

亦云髣髴似君山

溧陽書事

風引僊舟去莫同  
自知名魏郭林宗  
倦游偶作連朝住  
頗覺臨邛費繆恭

舟中二首

頻歲崎嶇道路勞  
江山妙處屬吾曹  
欲將一籠盛歸去  
安得并州快剪刀

歲月侵人去若犇  
雪消歸水不留痕  
詩情本自無多子

深謝江山稍見存

湖州舟中

平生苔雪又扁舟尚喜深盟不負鷗憶昔詩篇渾漫興  
祇今翻覺費冥搜

舟中雨

秋草猶青可放牛雨林如豁更鳴鳩荒雞渺渺三家墅  
白鳥悠悠數里洲

艤舟龍遊龍遊唐盈川楊炯嘗為令

穀波亭下一維舟小對秋風梳白頭欲賦新詩欠時體  
江河萬古歎風流

安仁艤舟作

客路不知時節移忽逢柳色已依依無惊却數離家日  
臘盡春回方始歸

松原山行七絕

雨勢崩騰略未休澗衝溪惡使人愁那知今日松原路  
拄杖挑包得自由

莫道松原路不通  
擔肩樵斧往來同  
老夫自是山中友  
要涉崎嶇盡日中

鳥噪猿號古樹叢  
亂青叅倚更撐空  
悠然到處皆詩本  
須信山行不負公

雨後浮雲更擁山  
須臾已作太空還  
了然悟得淵明意  
投絃歸來徑掩關

電激雷奔是處聞  
綠迴青遶四無分  
哦詩幾側風前帽  
縱目閒看雨後雲



涉水穿雲殊好在自知元是箇中人何時粗畢尚平志  
衡嶽匡廬收此身

一日周遭度九溪快儂雙腳淨無泥真同落落石為枕  
寧規區區沙築堤

與碩父沈弟伯仲晚行河堤碩父欲作小亭于  
其上且云西南得山最多即其語作絕句

斷水橋橫獨木過西南盡處得山多自嗟不及兒童樂  
橫笛騎牛穩下坡

舟中晚作二絕

天如慳此好江山故遣風帆送我還  
日暮白鷗猶未宿  
衝烟時復度前灣

嚴發江山天下奇經行凡作幾篇詩  
何當便畢尚平趣  
占斷清波垂釣絲

江山道中

蕭蕭風雨急還休無數倉官立道周  
多少詩情渾漫興  
煙雲不隔四山秋

鼠山

鼠山山下鼠山潭名字常因艇子談  
幾欲賦詩收拾汝技窮如我莫多貪

登岳陽樓

太史南遊上會稽愛竒端欲助文辭  
蕭騷白髮離騷國不到巴陵終欠詩

自昔騷人半此州不因放逐即淹留  
我今母負仍非客何事汎然還一遊

幾思假日賦登樓  
風雨連連不肯休  
待得晴時又成去  
再三舉手謝沙鷗

晚風何許遞參差  
南望令人思九疑  
渺渺煙波莫能極  
誰云一葦可抗之

鵝湖道中二首

兩道蒼松列翠幢  
雨來渾似度桐江  
恨無東絹堪圖此  
歸伴蒲團掛北牕

人間那有萬株松  
莫道名山都未逢  
自挂枯藤行不倦

更聽齋後幾聲鐘

鵝湖道中呈斯遠

翠阜奔騰似列屯，老松錯落更橫陳。  
風高日暖鵝湖路，宜此蕭然兩幅巾。

將至辰州走筆寄在伯教授二首

去年十月君行此，今歲茲時我繼君。  
黃花赤葉雖如昨，所恨詩壇欠策勲。

庭前甘菊都開否，記得去年同把觴。  
相逢勞苦定愁絕。

我哭途窮君悼亡

亭午欲過意復淒然偶引杯酒而沅陵丈送詩  
適至因走筆成兩絕併呈教授兄

梅花玉立知何許回首江東日暮雲白髮蕭蕭不歸去  
顧徵蠻語作參軍

寒廳冷日不能暄杯酒時須手自溫賴有好詩頻送我  
能教病眼洗眵昏

姑蘇道中

麥浪搖波柳映津  
吳鄉春色見今晨  
欲將何以慰無賴  
一酌濁醪如有神

早飯龍堂寺

寺之左廡為  
昨雨所敗

擗藤束縛竹為輿  
野飯來尋僧所廬  
茅屋正逢飛卷破  
夜來風雨問何如

過旁羅見靈山

過得旁羅上下灘  
望中青出是靈山  
三年此地四來往  
老矣何渠成厚顏

歸近

黃溪潭上晚風生  
吹我孤舟直又橫  
歸近尚餘三十里  
不妨待得月同行

樓步

人家簇簇晚煙青  
湖上船歸渚市腥  
細雨如絲山色暝  
一杯濁酒慰飄零

上饒道中

踏土憂疑似踏舡土  
膝滑汰勝於舡川  
行可怖陸行苦



誰遣為之空自憐

過雨市二首

廬溪溪水接宣風  
四面青山圖畫中  
盡日苦吟吟不足  
始知才盡景無窮

晴裏看山故自佳  
雨邊益覺興無涯  
我家正在千山底  
每一看山還自嗟

書雙逕鋪

昔者曾看此拈花  
今焉梅謝柳生芽  
無窮甲子隨車轂

有限光陰屬鬢華

題仁康鋪

四松離立類巖幽  
遮我聊為半日留  
更恨月明清夜影  
不能於此聽颼颼

發石佛

石佛如今果有靈  
盡驅昏翳作空青  
松原白石今朝過  
雲洞月巖明日經

舒村

有竹如椽故可佳  
况於竹外隱鷗沙  
不嫌官道多車馬  
此地端宜著釣車

發豫章後二首

楓林滅沒橘林多  
酒戶漁家奈若何  
賸欲與渠論久住  
一官老矣尚奔波

詩成欲賦江山好  
政爾多言恐害廉  
只恨十分朝日美  
可能身獨負茅簷

登安仁雲錦驛後挹僊亭三首

古木陰中屋數椽  
下臨縈折幾山川  
晚來快雨仍新浴  
端覺飄飄意欲僊

未解桃源果有無  
樹林樓閣世行圖  
此亭縱說空無物  
猶有僊山來坐隅

對面雨來山欲移  
援毫我亦賦新詩  
扁舟縱是促行去  
不廢小亭筇一枝

題泰州司理廨舍小亭

鑿去為亭因得池  
面池老柳蔽仍虧  
客來不用勤修供

乞與繩牀令賦詩

寶氣亭三首

西下扁舟浩所經  
暫梯隄石上津亭  
偶從長老詢遺迹  
說道神遊尚炳靈

誰道劒池今已荒  
有時光恠此何祥  
平生自省慙多識  
曷日乞靈親炷香

徐家筆力見南唐  
今代更推江夏黃  
屹立二碑端不朽  
未輸滕閣擅三王

灘頭寺懷莫升之

青衫縣尹沈泉久黃綬尉曹華髮多重到灘頭舊遊寺  
一觴獨舉奈愁何

鄧林寺用孫溫叟韻

上天有路不為難丈七坳頭莫據鞍小憇還尋去時寺  
戲拈枯筆臂猶酸

宿甘陂寺

逢人問得甘陂寺窈窕深穿翠剌來細雨斜風勿渠忤

要令瀟洒滿吾懷

途中呈明叔

相逢何必道寒溫  
所過江山合細論  
四體不佳談舌強  
不妨展卷有詩存

自安仁至豫章途中雜興十九首

野市穿殘路接溪  
敗船廉索兩相依  
居人欲渡頻回首  
客子將行屢攬衣

漠漠平蕪遠際天  
青山若箇暗霾烟  
行人更說橋新斷

試遣招呼與借船

極目荒陂十里餘  
壞塋依約舊犁鉏  
問言業薄無牛力  
更說州家催積租

幾日舟行罷作詩  
直緣山水賸含輝  
今朝眼界荒涼甚  
却遣毫端為解圍

快雨懸知亦快晴  
解包何惜片時程  
須臾雨止晴能好  
一道雲山潑眼明

小立溪頭喚野航  
雨餘林木倍森涼  
少焉步到臨流寺



鸛鶴飛鳴滿夕陽

湖南茶寇甫能平  
湖北徭人復弄兵  
政是耕桑好時節

爾曹何苦自捐生

塗中遇湖北  
告急之使

郡邑貪殘固合誅  
釁端繇爾復何如  
官軍可怖無輕敵  
直恐微軀不足鋤

積潦當塗三尺強  
筍輿那得代浮梁  
脫靴直厲成孤笑  
赤脚踏冰思舊狂

草樹葱蘢山有衣  
稻秧刺水綠生漪  
眼中風物方人境

犬吠雞啼間處彥

平生食肉吾無相  
雨甲烟苗足慰貧  
幾日山行更無此  
況堪拈米惡於塵

提封俱是太平人  
爾輩何緣獨苦辛  
見說窮南有蠻蜚  
直疑於此是比鄰

參天落落復青青  
風過笙竽得細聽  
睡思莫將茶料理  
只須卧此片時醒

虬龍天矯已分形  
想象靈根長茯苓  
安得一掬風雨庇

要思服食制頽齡

已是酴醾墮玉塵尚餘芍藥殿殘春  
山行寂寞那逢此喜向僧房見斬新

曉雨猶偷客枕安重煩啼鳥報艱難  
整車欲去還休歇雲合忘蹤山四攢

林雨淒淒林鳥啼水田漠漠水禽飛  
人間何處有此境只欠冰紈相發揮

時雨催農不厭多客行無奈路長何  
怨咨何與天公事

慷慨聊為勞者歌

農事催人未遽央種秧未了插秧忙田家作苦吾常逸  
所愧饑寒趨路旁

發大通

五更催發船無限及此風收浪不生何事漁舟亦爭進  
始知為利總營營

安福道中見牛行隴畝間齧草而不食禾問之  
皆云穀成實則牛不復食矣

種得離離職爾劬朝滕暮隴只生芻絲毫無補家先實  
媿殺紛紛小丈夫

回悲芙蓉寺偶題

太華難攀十丈花白蓮零落遠公家此中那得嘉名占  
綠水遶除山四遮

獨樹

獨樹幽花明屋角頓驚門戶有光輝向來荒草幾埋徑  
今日行人欲叩扉

過王宗臣允元園廬三首

大梁城裏王居士園有江南數種梅亂後只疑隨劫火  
那知移向此間來

不但栽梅如昔人詩名籍籍舊傳聞我來豈直為花設  
傾側相期出近文

擬欲過君非一日哭妻值我買船東人事好乖有如此  
轉頭今忽兩春風

步北園示沈四弟

得趣堂前蓬蒿深主人何惜費千金我行旬月當重到  
要見梅花出樹林

亦好園

金谷惟堪貯俗塵輞川今復得詩人先生道是貧到骨  
猶有山園斗大春

步沈園

黃菊花殘白菊花孟冬風日亦云佳晚來忽有尋詩興  
送盡投林萬點鴉

寄向伯休且約他日道為薌林之遊二首

東郭竹谿君所廬我家此物也扶疎何時歸去數來往  
不似而今空寄書

平生薌林五十詠何意扁舟其下過王郎逸興非余有  
不問主人防怒訶

遊叫巖用范元卿自普康歸日留題韻

元卿詩  
云溪心

續石圖如磨巖腹精廬冷似冰弭  
楫來游衝夜雨脩然一叟對孤僧

溪行又作叫巖登涼冷端如快踏冰所過有山成一訪



是知我亦在家僧

雨中同曹尉遊王儵巖二首

舊說吾邦巖谷多  
歷觀無愈此  
差我今朝喚渡仍衝雨  
慙愧溪神不我訶

驟雨翻空何自來  
飛流濺沫洗崔嵬  
要題短句書奇事  
付與曹郎八斗才

十月十五日

柳行搖落參差際  
鴈字虛無滅沒中  
醉面紅來因卯酒

征衣脫去為霜風

題白龍洞

流水踈梅我有詩，偶來重見雪離披。  
五年不蹋常山路，

咫尺寧乖一赴期。

丁酉首春過此嘗有句  
辛丑歲除前三日再來

題黃溪壁二首

新居不見邠山主，及到黃溪又不逢。  
錫杖徐飛向何處，  
檻前山水自為容。

此邦茶品固多有，聞說黃溪獨未嘗。  
何日敲門辱持贈，

更須高誦碧雲章

過飲畢叔文家題其壁

擬過君家看牡丹數枝纔及海棠看百年舊事誰從說  
杯酒相逢強自寬

過叔異曲江磯叔異已赴官矣題其壁

故人去適梅花外客子來哦桂樹秋欲寄一行無鴈過  
漫題數字荅蛩幽

書靈鷲壁

支頤獨立到棲鴉送了虛廊日却斜  
冷蝶不知時節晚伶仃猶自抱寒花

題新庵壁間

道人庭宇知何有幾箇修簷一樹梅  
說似庵門莫深閉斷無俗客此間來

書乾明庵壁

道人持鉢向何村黃葉投風靜擁門  
自買束薪來燒浴浴終早已四山昏

九日題越州光孝觀壁

小檻叢花未肯香  
客中我亦忘重陽  
要酬風雨滿城句  
早合四郊塵政黃

題三老堂壁

雨過湖邊秋思多  
悵無輕擺傲漁簑  
向來夢境今安在  
名與青山保不磨

題劉叔驥夢游赤壁賦後二首

三國功名可立談  
賦成赤壁倍嶄巖  
想君夢去神游處

慷慨風流真可參

江湖知友亦云多  
每歎風流奈若何  
水落故知當石出  
鏡中寧惜鬢將皤

偶書道店之壁

愁邊得酒寧論味  
馬上成詩不計篇  
不是行人那識此  
知音應為一悠然

題豐陂鋪壁

樹影當階日正中  
一蟬何適自吟風  
病夫畏病怕觸熱

聊此設牀尋睡功

生米磯之至德觀余舊遊也嘗有題釣磯胡栢  
七言二絕句庚子夏五月八日再來道士復向  
余乞賦仙洲平遠濯風湧月四題因各與一首  
仙洲則新建簿嚴造道名之

此地傳為天寶門政由漁叟話桃源閣中名字誰為立  
知是君平幾世孫

舊聞但覺生米磯新遊更見黃連石石邊磯上有軒窓

萬里一時來咫尺

往遊故喜秋無暑今至還欣夏有涼  
襦襪不能來熱客  
冷然聽我夢還鄉

團團政爾來天下皎皎何從墮水中  
賸欲學為牛渚詠  
只愁笑殺綺裘翁

題方士繇伯謨五丈所居三首

詩名舊仰方豐國句法親傳呂紫微  
聞道有兒能世業  
師門更向晦庵歸



文定去營衡麓宅仲容自老籍溪傍祇令風月無人主  
今代玄英更姓方

遠庵庵榜晦菴書不獨人高字亦如隴畝縱令非我有  
溪山政自要君居

題臨水茅亭

竹裏茅檐竹外溪青琅玕映碧玻璃吟從亭午到薄暮  
詩就不知安所題

曉簾亭

欲買寬閑結釣菴一竿投老寄江南是州亦在經營裏  
先手落君無可談

冰玉溪山近與隣我舟來往故成頻眼邊風物渾如舊  
只欠行吟采若人

謂介菴

愛竹舊時王子猷造門忘主見風流如君不但無鑠鑰  
更向山陰具小舟

段元衡出示與晦翁九日登紫霄峯詩及手帖  
并及賈八十兄詩既敬讀之得三絕句

紫霄峯上登高節想見笑談賓主間我亦於今有遺恨

不隨巾屨上南山

晦翁比自浙東歸過玉山留數日

文章定價如金玉入手可知高與低今代師儒晦菴老

許君先達並江西

晦翁與元衡帖見佳句有正使江西諸先達在不過如此之語

季承新寄嶠南詩君亦南遊弔楚纍冰水玉山元自好

蠻烟蠻雨只生悲

月巖

論畫以形詩必疵東坡老子笑人癡月巖本是梯空石

底事輕論圓與虧

舉頭見日猶為近  
何況凌虛到月邊  
更欲徘徊究真妄  
無人與我共談玄

那得空山月半輪  
天將絕境驗詩人  
古今來往知多少  
底事流傳略未聞

從禮載酒要余及明叔  
遊合普六首

此君住處是長身  
靜遠吟行要日親  
何事當前遽安障

未能忘俗遂忘真

寺有竹當軒僧  
築牆以截之

花開無計杜遊人未若栽松遠世塵莫問何年棟梁用

也勝開落撚由春

寺有牡丹為從禮  
移去今植松云

兒曹謾作看花忙我輩看山興更長敗意幸餘鳬鴈集

少湏落日下牛羊

塵埃老矣未收身每對山林強自親詩縱滿囊慙李賀

筆雖成冢媿藏真

一軒高竹似高人烏雀馴除不動塵首夏清和故應好

可湏載酒抵尋春

官忙未抵作詩忙九十春光自短長三徑可歸誰是伴  
若人風節慕求羊

書合龍寺舊題後

題詩客子鬢如銀壁上題詩墨尚新  
犬已久忘曾宿客  
半山風鐸似迎人

題中團寺柱

向來不識中團寺一自移家得屢過  
縱使山僧真厭客  
淡然相對有維摩

妙香院僧堂後路直臨溪石臺古松蟠其上松  
之下有足跡及石穴三十餘淺容杯水問僧云  
自昔葛洪鍊丹種桃於此穴乃丹竈其數三十  
有二適與龜峯相應亦謂足跡為仙人迹又有  
云日光照石壁隱若青紅盃桃影云作兩絕  
臺高十丈獨株松下有僊人舊履踪三十二窠丹竈在  
亦云數目應龜峯

壁間石色隱青紅指似天天即此中金石著文猶巨信

況堪傳者自漁翁

重過東湖二首

憶昨追涼孺子亭再來荷柳競凋零試當止水憑欄看  
我亦踈髯白數莖

敝車羸服豫章城幾向東湖得細行不但屢來人似識  
白鷗相慣亦忘驚

遊仰山欲游蘭若不果懷混融二首

冒雨來看大仰山不惟泉石意相關混融時事誰能說



稍向詩碑見一班

欲尋蘭若尉知名  
獺逞橋頭水亂鳴  
引領白雲人甚遠  
縱遊誰解飲淵明

梅林渡懷惠卿

近城亦復多漁戶  
作吏聊須似馬曹  
更想周家江上屋  
竹林梅樹出簷高

淳熙稿卷十九

欽定四庫全書

淳熙稿卷二十

宋 趙蕃 撰

七言絕句

白水寺

霧合深林曉到遲  
樹搖宿雨訝晴曦  
不知客裏何遷次  
一似山中初起時

玉聚

介然誰主復誰賓  
風月婆婆却自親  
留得清名傳野史  
未妨白眼向時人

廿二日題水南寺壁

落花飛蝶兩翩翩  
二月清明雨後天  
白酒一杯成坐睡  
宿寒猶在未除綿

題衢州城外包氏水閣示遠父成父二首

溪流屈曲總成灘  
灘外雲山遠近看  
何許詩情最闊處  
渚鷗能白晚楓丹

買得溪頭一葉船去留無繫總悠然不惟畫本輸摩詰  
更有詩材屬惠連

曉登快閣

庭中但覺木搖落江上始知秋氣高不待月明飛鏡夜  
此時自可數秋毫

木落千山秋又深病無眼力怕登臨所湏一雨添清漲  
送我歸舟返故林

雪浪閣二首

木末闌干渺未平泊舟石徑得深行舟行不見江流濶  
一上憑高覺快生

雪浪軒窗由塊石未知欄檻倚江邊故人曾為魚烹怖

一看姓名增惘然

謂莫升之

憇汭口之秘藏院

老至渾亡舊所經漫嗟古屋暗丹青庭空廢掃蒼苔長  
時聽風拋柏子鈴

題圓通院

吾家舊築爐峰宅豈不懷歸困轉蓬奔走微官遍林谷  
却尋清磬到圓通

晏齋余自名也故常以榜自隨乃以名廳事之  
東偏廳之後舊有一室面對竹余山居富此物  
亦以竹隱名對此竹而有思于山中故以思隱  
名之思隱之東又闢屋丈許連以為齋乞名於  
張君伯永為名曰容齋併作三絕志其事焉

以晏名齋懼不安居間從仕莫殊看蔥蒨麥飯自可飽

惟去不須如井丹

此地何因著此君藉之除掃簿書紛山中為爾曾成隱  
回首悠悠空暮雲

容膝徒知取易安容君數百又何寬若人問我名齊義  
兩語從渠作麼看

徐君李純常德教授闕中名一室曰如舟取東  
坡為宛丘詩而云也過之欲為賦詩意到輒書故  
不免雜出君居龍游故有盈川之句詩臞云者

蓋初未識而為薄公曾元之所言也凡五首

知君雅趣在滄州  
游戲名齋亦以舟  
舊識盈川川上路  
幾時乘月下嚴州

我本江湖一釣竿  
直鉤不幸得魚難  
雖然尚有扁舟念  
一到君齋作是觀

莫嫌學舍小如舟  
容得平南酒拍浮  
試問夢為蝴蝶去  
何如萬里沒輕鷗

欲為如舟一賦詩  
如舟無楫更無維  
汜庠不繫知何處



當有長風破浪時

滿面風埃霜鬢鬚何如相識謂詩臞君行學省得佳士  
我乃烟波稱釣徒

戲呈盧老

曉起題詩硯欲冰折梅還却步凌兢不如納被蒙頭坐  
坐到齋魚始一興

贈龍王山菴秀上人

道人學易更參禪一住江頭已六年勸我小留殊不顧

那知風雪有回船

示梅山寧老三首

梅山不見梅夫子宗派仍亡宗上人梅句不刊宗有集

山應生喜亦生嗔

梅公聖俞有詩  
山中今亡矣

八年再到仍衝暑長愧堂中結夏僧我欲松間借餘地

聽風聽雨髮鬢髯

僕丁亥夏  
嘗過此

贈南首座蕙簡廬老二首

旋糊紙屋過冬寒客至成開去即關我亦借寮成掛搭

未妨朝暮往仍還

主人禪伯仍詩伯招得渠來共此山掛搭問儂能膽大  
詩關直上有禪關

雷老欲退普寧二絕句

借閣看山且半年看山未飽此為遷聞師亦欲拋山去  
祇恐山靈未許然

懷玉山中舊住人歲寒菴裏坐禪身當年未解來飛錫

今日何妨却問津

雷自懷玉  
來住今剎

贈法雷

道人曾與謫仙游，仙去騎鯨師白頭。  
騎鯨端復向何處？

試問援琴招得否？

謂李松菴

待斯遠不至

靈溪寺下靈溪渡，跋馬欲前還又回。  
準擬故人能會宿，不知何事不成來。

彥博周伯休來

剝啄能來兩玉人，飯蔬糜粟共吾貧。  
更欣兩子知人意，

為作蕭蕭破暑新

與歐陽伯威同飲遇卿江樓

不上江樓又兩春  
人間到處略知津  
勞君置酒仍呼客  
快語端能洗劫塵

雨後口占簡在伯二首

雨小寧論旱可濡  
涼生但喜病微蘇  
歸雲返照當年句  
落在君家我所無

蕉心待雨慵能展  
柳葉非秋間自零  
覓句政資閑草木

荒涼於此只空庭

代書示逸二首

風號窗外獨株松  
想汝看書起曉鍾  
是我起行茅店月  
禦寒還覺欠龍茸

別日纔留兩月糧  
况經裘葛變炎涼  
未知別後端何似  
不見寄來書一行

雨中夜歸聞兩兒誦書偶成二絕  
幸明叔先生  
同賦以示之

金安四庫全書  
卷二十一  
簷雨浪浪欲二更短檠明火讀書聲憶如汝大政如汝  
一事無成今老生

家世無田事筆耕五車精熟是收成窮通有命吾何與  
若若多慙短褐榮

同何叔信赴在伯之集醉甚既歸得二絕句併  
呈

醉裏狂歌君不嗔知予嗜酒見天真還家徑卧寒窻底  
要暖編麻更爇薪

已向剡溪衝夜雪要從東閣問官梅  
氣豪湖海寧辭醉  
老怯風霜祇自哀

予方作書招成父入山成父亦移書招予出縣  
報以兩絕

阿連折簡能招我危坐哦詩正憶渠  
不是下山防破戒  
政緣抱病怯行輿

乏食寧憂陳蔡厄堆案自有班  
左書不嫌荒寂肯來過  
草徑已教童子鉏



招在伯

忽忽重陽今一月菊花數朶見城根前詩有約能從否  
不厭張羅幸過門

舟中獨飲

已是支離百不禁況堪多病苦相侵村沽縱薄可不醉  
梅半落時天政陰

示贈耆英并其侄

伴我山行陳與吳曾家父子更憐渠武山碾得雪相似

來酌觀山水不如

兩過知津酒正漚元壽皆留飲漫興絕句

楊柳依依洲渚深駕言聊爾縱幽尋不虞為子登臨費  
但約新詩好處吟

贈吳昂山人二首

又是芳菲一番新寂寥依舊去年貧相看不用談餘事  
且道逢迎有故人

君行足跡遍江南我亦飄零老不堪幸自尊中有醇酎

何妨醉倒又空談

荅簡審知

早起難勝上水寒  
為君還復念湖灘  
泥滑塞驢難跨去  
七言聊遣問平安

老卿携詩三篇來復荅一首

閉門兩日病不出  
得句誰能就我哦  
貧家尊酒可憐許  
飲君寧得到無何

曾相士約過意釣荅以絕句

為竹作亭還斫竹取詩名榜更題詩歸來十日未一往  
聊待蕭然雨後時

沅陵契丈用蕃將至辰州寄在伯兄韻作詩見  
屬用韻奉荅二首

往日交游纔著我近來酬唱喜添君請君立拜詩壇將  
容我閒尋茗椀勲

能事豈工刀與筆閒情聊付詠而觴生前憂累須陶寫  
身後聲名盡在亡

僕有詩思成父輒知之而絕不肯道一語以二  
十八字戲贈

詩情鬱鬱見鬚眉何意君能輒識之目擊道存真有得  
傍觀袖手豈非癡

報謁徐大雅仁因以題贈三首

好在東都孺子孫壯年曾謁舍人門祇今此道同終少

君獨深藏恥自論

君昔從呂公居仁  
講學公有贈詩

我住東郊祇樹園無人肯顧席為門多君用意非流俗

忙裏偷閒每見存

蘭芽紫圻映青盆  
杏藥紅深供佛瓶  
何獨春能歸草木  
看君已老鬢重青

贈許季升五首

東都籍甚汝南許  
人物嘗更月旦評  
後嗣流傳齊一變  
如今推步有知名

清江人物推陳謝  
不減當年孔與劉  
肯為賦詩仍作序

要明吾子乃儒流

賴陳丞序贈君良齋  
謝昌國有詩有跋

方朔人傳是歲星又云太白本長庚如何未免饑欲死  
亦有佯狂萬里行

惶恐灘頭一扁舟桃花水漲如乘流君來叩戶喜欲倒  
一問此行還遂不

學詩自足致寒飢更欲探求造化機我坐一偏猶不免  
君今兩取是邪非

許亦作詩

讀公擇篋中徐季益孫子進昆仲詩有懷其人

因以題贈四首

幾年禪月閤靈棲石磴崩摧僅可梯誰遣詩人來借住  
自應無飯只羹藜

恠渠詩律自江西曾把文章謁紫微今日淒涼亦何甚  
異方流轉未能歸

囊有清詩無一錢夜窓翻倒謾妨眠荆溪溪上長回首  
不見音書已二年

我貧猶說在家貧羈旅如君更感人強道詩工能泣鬼  
未如錢夥可通神



再贈

衆醉紛紛忌獨醒也思放意遣沈冥斗牛用事無庸問  
為問何年用酒星

贈別耆英二首

學詩曾及謝玄暉傳授應同一唯歸舊宅縱荒書故在  
不妨幽僻借僧扉

憶我移官惶恐灘肯來徒步不為難頗亦念君家四壁  
囊中羞澀但頻看

宜春道中贈邢公昭二首

清江臺上讀君詩，頗欲相從慰所思。  
忽成風雨對牀期，何意昌山夜止宿。

問君家在離騷國，句裏應含蘭芷香。  
邂逅宜春須小住，要期傾倒錦為囊。

斯遠兄入城見使君，即中且謁尚書韓先生。  
屬李大題詩以贈四首。

雨後乘流絕快哉，眼中無適不詩材。  
詩成去覓騎鯨李。

金匱要略卷之八  
衞袖探將一笑開

南澗先生歸幾時南溪如泛未傳詩  
君行為我殷勤錄  
并問茶山僧乞碑

永嘉別駕從渠說為說錢是  
好風通聊以吾云卜吾子  
儻賢吾亦出蒿蓬

上饒耆舊無曾呂月旦多稱李  
德翁聞道二難真頃有  
盖公堂下求盡通

余客長沙寒熱驟作其證未分  
理掾次律張君

為致醫王生述治之藥與病合兩日而愈作七  
言二韻詩二首贈之

士不知聞未易輕問醫誰復話君名殷勤多謝長沙掾  
為我致之分死生

頻能通汗信柴胡亦是於君想報珠傳聞治嗽更多活  
豈止飄零一老夫

次韻斯遠見過三首

形影相隨一病身窮愁忽忽又經春為傳車轍來何自

知是君存寂寞濱

語到蟬連自不休  
吾曹豈亦固相求  
望窮雲谷雲深處  
共約驂羸向晚秋

四山一夜雨連明  
豈料新晴頗得成  
還往自茲寧可計  
要須留句當題名

次韻楊廷秀太和萬安道中所寄七首

記得詩來半說花  
不言長道苦風沙  
知公不薄嶠南使  
政似昔人何以家

愛竹知人憶故山  
食貧過午尚懸簞  
長篇乞與小詩並  
要似韓豪東野寒

舊說洛陽天地中  
遂令北客病南風  
只今政教通南粵  
亦有大寒桑樹紅

幾欲裁詩託便風  
苦慙別後欠新功  
何時寄我廣南作  
壓倒蕉黃荔子紅

先生力學自誠明  
忠信今知蠹豸行  
憶昔韓蘇兩仙伯  
海成冬市况融晴

幾為年華歎物華只今結束定還家且看垂發江邊樹  
未問長安一日花

莫為趨朝亟載脂小令羸瘠長膚肌帝城書疏舊不入  
何有畫圖傳荔枝

次王照隣韻二首

長年未省厭長病一暑方憎又一春把卷頗思親玉雪  
出門無那苦埃塵

虛憊徒恃井陘師空壁爭趨漢鼓旗少不如人當自笑

況於心在力疲時

曾裘父寄二絕併呈審知一再次韻前以寄曾後  
寄審知四首

向來共和有羊何今見公才十倍過可念此身如垢鏡  
要須著手為揩磨

紛紛競說杜陵翁此老真能數百容我亦幾同葉公好  
駭然今日見真龍

安否別來端若何尺書可是雁無過南豐惠我新詩什



亦復懷君舊琢磨

南豐鬢髮已如翁子蓋他時冰雪容長少結交端有道  
我凡何處濫登龍

七月六夜聞雨寄懷欽止斯遠而玉山便來亦  
得斯遠六月十五日懷去年夜雨之絕句復次  
韻以報

夜聞簷雨憶年時亦復思君近寄詩開卷忽來同此作  
信知神合但形離

次韻成父二首

離居想見泊無娛  
肯憚尻為上下輿  
一見故憐無可語  
要知終勝百函書

苦愛香醪似蜜甜  
舊如杜老意拳拳  
而今已作淵明止  
別意欲醺醒重憐

次韻審知十三日四絕

起看山月墮金盆  
不料陰晴忽異門  
我亦忍饑無復睡  
絕憐甑倒又空樽

咫尺相望得步過忽然一雨阻山河興來逕欲尋君去  
數問溪流退幾多

尺水真成起丈波水南水北斷經過幾思落筆題觀漲  
却恨詩材本不多

連朝風雨已如秋頗念林園柿栗收謾說為生鄙計笑  
邇來鹽米屢關憂

次韻衡州先生歲除前三日席上兩絕句

青山著雪倍增妍青草掀泥浩莫邊便覺欣榮似春日

不知凋落是殘年

非無曠野堪犂具亦有清江可釣絲為底崎嶇衡嶽路  
良由寐寤竹齋時

次韻斯遠雨過彥章併屬彥章二首

聞君訪隱曉衡泥竹盡林壑入稻畦我亦有懷思並輟  
不堪驢蹇更牛罷

老去蒨章恥未窮力耕豈謂歲能逢切磋政爾須公等  
戶牖多開恐妄從

昭禮在廬山與予分路昭禮舉王光遠在廬山  
別周元翁明朝山北山南路各自逢人說勝游  
之句昭禮用此意作詩因亦次韻二首

昔年挂席過江州曾為廬山盡日留斷句得君相舉似  
夜窓應復夢成游

人物君非第一流周南底事歎淹留清名所得蓋多矣  
騎鶴揚州有是不

次韻斯遠二十六日三絕

幾欲收聲效不鳴惡同鳩輩管陰晴有時觸撥無窮景  
又遣新詩取次成

傭販人人有闔廬偕居如我絕無娛書無厚祿庸何歎  
賴爾詩能數起予

春風去我孰能留寒疾聞君頓已瘳示以斜斜并整整  
故知莫莫復休休

次韻衡州先生除夕絕句

懷抱因公得好開鬢須嗟我怕年來敲門既辱頻傳句

守歲仍呼共引杯

次韻見可書示二絕併以送行

鷺立長灘本為飢水深魚沒定奚為何如煙雨青林畔  
漠漠冥冥縱所之

詩材畫筆本同姿造物嗔人可怨飢行橐君無歎懸磬  
褐衣我亦欠絢絲

次韻元衡兩絕句

倦遊如此不嗟窮醉眼猶能遠送鴻笑我老無湖海氣

但思疆理事南東

舊說詩壇不可攀豈期於此得窺斑  
茫茫世事催人別  
數見猶期數日閒

次韻唐與文驛馳代簡二絕句

西去曾悲鳥道沿東來又駭畏途鞭  
如何一舸西江上  
放溜乘風不用牽

別日常多見愈親立談已覺潯車塵  
詩成兩地嗟何及  
明月相同影伴身



見梁檢法書懷八絕句于廣文尉曹處次韻

文力縱橫昔未窺  
每聞二子說襟期  
來朝借得新詩卷  
起我閒窓病酒時

醉眠欹側似乘舸  
颯颯溪風吹鬢毛  
頗念乘流覓歸路  
兀然驚起遇灘高

修眉畫就莫求工  
自昔常聞妬入宮  
不為無人芳自吐  
也勝能白又能紅

漢詔元從漏網寬  
可將數畧作驚瀾  
幕中有此賢從事

我亦他時追免冠

山行難得上天梯舟泛還憂水路迷憶我故樓何許在  
玉為山下是冰溪

辭好曾聞喻色絲那知妙處本天姿若窮句法源流遠  
曾見梅山唱和詩

中聖流風久未寒渺然何但酒腸寬渠詩下筆如山峽  
我思攀危上七盤

儻欲昌身詩莫昌折腰也莫嘆淒涼上書假傳非無例

慷慨相期入皂囊

次韻斯遠十六日見簡

忽來叩戶新詩句  
謂我將行可自踈  
暫向沅湘采蘭芷  
扶踈終亦愛吾廬

次韻伯元季奕送成父因以見寄五絕句

幾欲因人與問安  
南來不見信州船  
細思人世孰為別  
明月相望同一天

句裏興懷快閣晴  
獨登長是費幽吟  
有興能來故差易

真愁回棹似山陰

輕薄紛紛覆手空  
兩家交契百年中  
要折青蘭為遠贈  
同心更助服之衷

嬾性作書非所便  
憶君回首漫悠然  
如聞有弟忽相覓  
復道詩筒見附船

秋之為氣已堪悲  
那對摻摻舊補衣  
為報君家小兒子  
見時蒼白莫言非

次韻李袁州絕句七首

蕃以癸巳冬謁先生於長臺山間道中得三  
絕句書之毛龔州庵今春先生因遊秋禪過  
而見之乃蒙寵招并作四絕句語皆見及先  
生時有漂陽之行蕃來別併沐錄贈歸因繼  
作以獻崧庵已老杜陵樹家世斯文屬晦庵  
我是兩翁門下客未傳活法且深參蕃舊詩  
中篇也前後二首已逸去此篇以晦庵曾寫  
以與人故存

深林盡處背浮圖却悔與籃不跨驢珍重病僧留別語  
晦庵去後亦來無

路從迫窄因山轉喜見臨岐釋子庵野茗柏香俱不惡  
老松高竹更相參

山僧見客苦多驚問我何時復此行笑指壁間舊留句  
繼題曾辱老先生

先生句法從江夏今代詞人孰比肩戲出小詩還會否  
要收萬斛作泓泉

崧庵視我亦諸孫已矣無從作九原每聽先生談舊事  
恍如秉燭對羗村

先生對宅投金瀨林壑要從東野分便覓餘閒訪吾舅  
郊居賦就比凌雲

傳聞起施祇數日引領白雲猶在天試問今誰滿臺閣  
顧令是老落林泉

奉寄斯遠兼屬文鼎處州子永提屬五首

吟詩日日數梅花梅向飄零我返家尚有北枝堪點檢

君舟已泊岸頭沙

水南佳處說吾州塔廟相高竹樹幽落盡梅花雨方暗  
墊巾無藉一來遊

兩賢堂下竹參天雨後涓涓陸子泉耆舊難忘是曾呂

逸遺更取孟郊篇

孟東野有題陸鴻漸上饒新開山舍詩云驚彼武林狀移歸此巖邊開亭

擬貯雲鑿石先得泉嘯竹引清吹吟花成新篇乃知高潔情擺落區中緣

幾向餘干覓介庵騎鯨已去不容驂流風付與南池主

何日約君相就談



聞道當年五色裘飄然又入帝王州  
煩君一為問行李早晚遣詩相報投

寄文叔且問畏知近訊五首

曾中何止五車書記誦張巡恐不如有意詞科不難中  
掖垣諫省政須渠

左手持螯快引杯誦詩屑屑吐瓊瑰  
清遊晚上僊林閣平楫森簷玉萬堆

醉裏揮毫君不嗔平生嗜酒見天真  
離觴曾為黃花滿

別日行看梅又新

去年犯雪到西湖  
眼見梅花玉立孤  
今歲定無牢落嘆  
君詩清絕似林逋

近來周子絕無書  
目繼西江雙鯉魚  
出處不應違素志  
君如得來我歸歟

畏知時赴  
試江西

寄劉凝遠齋四首

舊來人物數諸劉  
公更詩名蓋幾州  
新貴祇今多故舊  
先生寧久滯瓜丘

曾因下座識元龍深覬歸途得款從顧我殊非黃叔度  
多君不愧郭林宗

少陵衣鉢在涪翁傳述東萊得正宗聞道曾經親授記  
不求印可誰更從

一生已分阻長飢輕薄羞隨造化兒遠寄微言作君壽  
無鹽何敢突西施

寄潘恭叔曾幼度三首

一冬風雪苦多寒春至冰霜更積攢咫尺端如隔千里

况於楚粵路漫漫

去歲附書并附詩自吳適粵至何時殷勤再覓銅魚使  
儻不沉浮敢恨遲

天將絕境付奇才萬里飄零莫自哀不爾如何吾幼度  
鬱孤臺又粵王臺

寄畢叔文二首

小園春物比如何想見花稠草作窠老去不能知許事  
顧懷修碧可磨抄

悶甚長須酒破除酒能作病又何如故人欲問春來趣  
多病還於酒醖踈

全真以斯遠所寄文卷後夜賦雨絕句元韻作  
詩寄斯遠蕃同之

甘林彼美露初團縱小猶堪白玉盤歎息菊黃雖可待  
孤根失所漫荒寒

行時取別太匆匆別後經懷數載中賴有書函與文卷  
不然何地可聞風

寄逸

思隱今年竹幾竿  
因人畧不報平安  
門東叫認真癡絕  
但有書來說飽餐

代書寄成父

已作南山半月留  
欲行更復待新秋  
不知幾日潮當發  
可及沙頭一醉不

寄李叔器兼寄毛伯明張王臣康叔臨三首

春水滿時春草生  
春風日日上江亭  
蘋花採得從誰寄

空送沅湘入洞庭

洞庭拍拍浸君山  
亭對君山君閉關  
勝日想多文會友  
定應憐我在荆蠻

向來相別恨忽忽  
別後長思講學功  
江水無由致雙鯉  
春風又是起歸鴻

寄林敏夫二首

聞說君家家具區  
秋風應熟季鷹鱸  
雖云禍福有倚伏  
要是知幾失早圖

吳江應已落丹楓况說楓橋半夜鐘想見歸心成日日  
暮雲如我憶江東

寄居邠

黃溪茶種有閩風憶昨緘封自贗公筠焙久空青茗裏  
紙囊盍寄白雲中

聞曾裘父丈亡追用前韻寄審知二首

涼風不審意如何逝日能言客有過師友淵源說宗派  
要君文字飽研磨



金匱要略  
卷二十一  
釣船頗欲佐涪翁當世知余莫取容誰料傳亡終欠識  
但同物論惜元龍

寄謝周子開

四益堂中四益碑南軒文字述家規殷勤打寄非無益  
從此折肱當得醫

因湯莘夫行寄歐陽伯威

傳得新詩過半年故應松柏尚蒼然要持尊酒為君壽  
邂逅門前有過船

寄毛伯明李叔器及康叔臨二首

日日江頭聞鼓聲問船云作岳州行如聞風便一日爾  
我乃終年懷友生

憶泛扁舟過洞庭自嗟垂老見飄零只今說着非無為  
曾與荀陳聚德星

寄莫萬安升之二首

我坐移官不作憂得君為主見風流移官得此天如惡  
遣落江西盡處頭

身在江西盡處山江東家住幾時還苦吟更與風光別  
一夜併成雙鬢斑

次張漢卿次房

平生幾讀右丞詩未見賢孫歸去遲邂逅雖欣適吾願  
欲嗟人事好乖離

寄愚卿二首

江邊欄檻竹中齋緣我頻能掃又開茅屋蒼苔喚歸去  
來禽青李待書來

馬甘薦秣自投轡巧彈何曾射倦飛風急正看蛛去網  
雨酣還見螳爭圍

人日寄成父

人日今年合有詩遠猶成憶近成悲試令一問津頭柳  
早似山中寒食時

有懷施文叔寄之

超果寺前江抱村數株喬木擁山門先生得酒日成醉  
不負春風野外昏

寄周愚卿兄弟

渚花飄錦已殘春  
幾對江山思故人  
邂逅欲書書不得  
醒狂於此見天真

寄李商叟二首

筍茁桐敷又一時  
想君日日有新詩  
詩成寄我何其晚  
要與羊何共和之

卿來我已後諸公  
頗願相從繒簡中  
豈若吾身得親見  
怪君風味莫之同

代書寄周愚卿二首

友于閣上友于人忽忽分携又兩春  
騰欲作書書不得  
舊知吾懶是吾真

窮岡岡上歐陽子荷屋屋中常不輕  
邂逅論詩儻相及  
為言即日鬢霜生

寄蔣攸縣礪二首

君家三徑開來久不待絃歌始得資  
儻欲賦歸歸便得  
湘山越嶺匪逶遲

湘山越嶺縱懷歸可廢當年靡盬詩府主甚賢賓得士  
豈憂磨磷涅能緇

寄周愚卿

買得武夷毛竹杖忽思江外友于人青原若訪常荷屋  
助爾扶携覓句新

寄簡歐陽伯威劉伯山

問訊窮岡病主人若為買得竹溪鄰是中剎有堪詩處  
恨不與之相主賓

代書寄張次律二首

道入袁州首問君  
卻言守舍有宗文  
不知木落風高際  
何處登臨對夕曛

聞道浮家歷上塘  
寒山鍾接洞庭霜  
是中佳句知多少  
儻有書來幸不忘

日者張一麟求詩謾與二絕句

惶恐灘頭住過秋  
秋風吹白幾分頭  
倚樓看鏡嫌多事  
况問陰陽家者流



袖裏之書辱見捐細看知是我行年家徒四壁將何贈  
乞與兩詩賒卦錢

鄭仲理送行六首

周郎三復似南容君亦因之師友同豈待湖南始相識  
聞風元自大江東

幾度擎舟湘水西風雩亭下詠而歸驩然諸友相忘意  
不叩仙壇與佛扉

坐上每懷歌慷慨杯行豈復計尋常我知不隔清風面

君想未忘明月章

溪山廓廓眼增明  
鷗鷺依依舊有盟  
所恨登高臨賦處  
却嗟我友不同行

渺然一棹去何之  
滿目新詩與舊詩  
細讀贈章多好語  
顧憐追和却無奇

病著形骸冷更慵  
短檠寧復有新工  
異時邂逅相逢處  
應歎依然舊阿蒙

又次韻宋茂叔送行五絕兼謝修叔

送我歸舟水一篙更攜佳語贖吾曹暮雲真作江東去  
不復沅湘誦楚騷

平日長嗟取友難年來頗得見班班顧憐蹇步終無及

天馬逍遙十二閑

太息平原生事疎老來亦欲事犁鉏儻然識得簞瓢樂  
祇見何妨有不如

淳熙稿卷二十